

Rhoi Hwb i Economi Ceredigion Strategaeth ar gyfer Gweithredu

2020-35



Cynnwys

Yr hanes hyd yma...	3
Sut yr ydym ni'n gwneud?	3
Beth yw'r problemau y mae angen i ni fynd i'r afael â nhw?	4
Ein gweledigaeth a'n gwerthoedd?	4
Cyd-destun a chwmpas strategol	5
Egwyddorion ac ysgogwyr allweddol	6
Yr hyn a ddywedsoch chi wrthym...	7
Cefnogi ein sectorau allweddol	8
Blaenoriaeth 1: Pobl	9-11
Blaenoriaeth 2: Lle	12-16
Blaenoriaeth 3: Menter	17-20
Blaenoriaeth 4: Cysylltedd	21-26
Sut y byddwn ni'n darparu ac yn cyfrannu adnoddau at strategaeth economaidd Ceredigion?	27
Mesur cynnydd	27
Dogfennau ategol	28

Strategaeth Economaidd Ceredigion

Mae'r strategaeth hon yn nodi sut y byddwn yn cydweithio tuag at sicrhau twf economaidd cryf, cynaliadwy a mwy gwydn i Geredigion, wedi ei greu a'i rannu gan bawb.

Mae ein Cynllun Corfforaethol wedi nodi rhoi hwb i'r economi fel y brif flaenoriaeth i Gyngor Sir Ceredigion, gan ein bod yn sylweddoli'r angen i fynd i'r afael â rhai o'r heriau sydd gennym i roi'r cyfleoedd i'n pobl a'n mentrau dyfu a ffynnu yma yng Ngheredigion.

Mae gennym ni sylfeini cadarn i adeiladu arnynt, a chyfleoedd gwych i fanteisio i'r eithaf arnynt. Er y bydd Covid-19, a heriau Brexit, yn anodd eu goresgyn, credwn y bydd y sylfeini hyn yn ein helpu i adeiladu ein dyfodol. Y strategaeth hon yw ein fframwaith ar gyfer gweithredu, gan amlinellu ein huchelgais ar gyfer y 15 mlynedd nesaf, a nodi'r camau y byddwn yn eu cymryd i wireddu'r uchelgais hwnnw.

Ni allwn gyflawni hyn trwy weithio'n annibynnol. Mae hon yn bartneriaeth rhyngom ni a sefydliadau eraill ar lefel leol, ranbarthol a chenedlaethol – ac mae pobl a busnesau Ceredigion yn ganolog iddi.

Gyda'n gilydd, byddwn yn parhau i adeiladu ar gryfderau unigryw Ceredigion a helpu ein pobl, ein mentrau, ein diwylliant a'n hiaith i ddatblygu a ffynnu.



Ellen ap Gwynn

Y Cynghorydd Ellen ap Gwynn
Arweinydd, Cyngor Sir Ceredigion

Mae'r strategaeth hon yn nodi pedwar maes blaenoriaeth lle bydd ein camau'n cael eu targedu er mwyn gwneud gwahaniaeth –

1. **Pobl** – ysbrydoli pobl, datblygu sgiliau, iechyd a llesiant
2. **Lle** – hyrwyddo Ceredigion fel lle i fyw, gweithio ac ymweld ag ef
3. **Menter** – cynorthwyo busnesau i gychwyn a thyfu
4. **Cysylltedd** – cysylltu busnesau a chymunedau

Mae'r rhain yn cefnogi'r Nodau Llesiant cenedlaethol o fod yn llewyrchus, yn gydnerth, yn iachach, yn fwy cyfartal, gyda chymunedau cydlynus, diwylliant bywiog lle mae'r Gymraeg yn ffynnu ac sy'n gyfrifol ar lefel fyd-eang



Mae gan Swallow Yachts yn Aberteifi enw rhagorol am grefftwaith o ansawdd da ac maent wedi gwerthu eu cychod i bedwar ban byd

Yr hanes hyd yma...

Mae'n amser cyffrous i economi Ceredigion, sydd wedi ei lleoli mewn un o'r ardaloedd mwyaf hardd ac unigryw yn y DU gyfan wrth i ni bennu ein nodau economaidd ar gyfer y pymtheg mlynedd nesaf – 2020 i 2035.

Mae ein maint a'n lleoliad yn golygu ein bod yn wynebu heriau i dyfu'r economi leol, ond yn yr un modd ceir llawer o gyfleoedd i ni fanteisio i'r eithaf ar leoliad y sir i addasu i ddyfodol carbon isel a digideiddio cynyddol.

Er mwyn cyflwyno ein strategaeth a'n hymyraethau hyd at 2035, mae'n bwysig i ni ddeall y sefyllfa yr ydym yn cychwyn ohoni.

Cynhaliwyd adolygiad llinell sylfaen o dystiolaeth gennym yn ystod hydref 2019 i nodi sefyllfa'r economi yn genedlaethol ac i nodi'r heriau allweddol i dyfu'r economi leol.

Ategwyd hwn gan ymgynghoriad cyhoeddus yn ystod gaeaf 2019/2020 i geisio safbwyntiau busnesau, pobl ifanc a'r cyhoedd ar y materion sy'n effeithio arnynt. Rydym hefyd wedi cynnal asesiad pellach eleni o effaith Covid-19 ar ein llinell sylfaen economaidd.

A wyddech chi?

Dros y pum mlynedd diwethaf, mae Gwerth Ychwanegol Gros y pen wedi tyfu gan **16.8%** yng Ngheredigion o'i gymharu â 15.7% yng Nghymru yn ei chyfanrwydd. (Mesur o werth nwyddau a gwasanaethau mewn ardal yw Gwerth Ychwanegol Gros).

Sut yr ydym ni'n gwneud?

Mae ein gwaith ymchwil ac ymgynghori yn dangos bod llawer o gryfderau a phwyntiau gwerthu unigryw i'r economi leol. Er ei bod yn amlwg bod Covid-19 wedi cael effaith niweidiol ar ein heconomi a'i fod yn parhau i gael effaith andwyol, mae'r sylfeini sylfaenol yn aros yr un fath – mae gan fusnesau newydd sbon rai o'r **cyfraddau goroesi gorau** ledled Cymru, mae gan ein gweithlu **sgiliau a chymhwysterau llawer uwch na'r cyfartaledd**, mae ein **heconomi wedi tyfu** ar gyfradd gyflymach na chyfartaledd Cymru dros y pum mlynedd diwethaf, ac mae'r **economi wybodaeth yn gryf** gyda dwy Brifysgol uchel eu parch.

Ond rydym hefyd yn gwybod bod rhai heriau allweddol yn ein hwynebu ar ffurf **denu busnesau newydd**, creu **mwyl o gyfleoedd gwaith**, cynnig **cyfleoedd i bobl iau** aros yn y sir a gwrthdroi'r duedd o **enillion is** o'u cymharu â gweddill Cymru. Mae demograffeg Ceredigion hefyd yn newid - mae poblogaeth gyffredinol y sir, ac yn enwedig y boblogaeth oedran gweithio, wedi bod yn gostwng dros y chwe blynedd diwethaf. Pe na baem yn ceisio dylanwadu ar y canlyniad hwnnw, gallai'r sefyllfa hon ddwysáu oherwydd Covid-19 a Brexit.

Ceir rhai camdybiaethau y mae angen i ni eu herio hefyd – bod **Ceredigion wedi ei gysylltu**, mae'r dechnoleg Band Eang Ffibr Llawn sydd ar gael yng Ngheredigion yn uwch nag yng Nghymru gyfan. Ond ar yr un pryd mae angen rhagor o fuddsoddiad i godi cyfran gyffredinol yr adeiladau nad ydynt yn gallu derbyn band eang 2, 5, 10 a 30Mbit/e sy'n dal i fod yn uwch na gweddill rhanbarth y canolbarth a'r de-orllewin.

A heb anghofio, wrth gwrs, **iechyd a llesiant** cymunedau Ceredigion – mae'r amgylchedd naturiol hardd, cymunedau diogel a chyfleoedd eang ar gyfer hamdden yn cynnig amgylchedd o ansawdd uchel i fyw a gweithio ynddo.

Yn erbyn y cefndir hwn yr ydym wedi datblygu'r strategaeth hon i **adeiladu ar ein cryfderau** fel sir, i **fanteisio'n llawn ar y cyfleoedd** sydd ar gael i ni a **mynd i'r afael â'r heriau** sy'n ein hwynebu i dyfu'r economi leol dros y pymtheg mlynedd nesaf hyd at 2035.

Sut mae economi Ceredigion yn edrych? Dyma rai uchafbwyntiau ym mis Mawrth 2020.



GWERTH YR ECONOMI

£17,461 oedd y Gwerth Ychwanegol Gros fesul pen o'r boblogaeth yng Ngheredigion yn 2017, o'i gymharu â'r ffigur cenedlaethol o £19,899 y pen



DIBYNIAETH AR FICRO-FUSNESAU/BUSNESAU BACH

Mae'r mwyafrif o fusnesau (99%) naill ai o faint micro (0-9 o weithwyr) neu'n fentrau bach (10-49 o weithwyr). Dim ond 0.5% sy'n fentrau canolig eu maint (50-249 o weithwyr)



ENILLION IS

£24,126 yw'r enillion blyneddol cyfartalog i'r rhai sy'n byw yng Ngheredigion, dros £2,000 yn llai na'r £26,267 ledled Cymru.



GWELLA CYSYLLTEDD

Er bod band eang a chysylltedd symudol yn gwella yn y sir, ceir 20% o adeiladau o hyd nad ydynt yn gallu derbyn cyflymder 30Mbit/e.




CYFRADDAU GOROESI CRYF I FUSNESAU

Mae 97.2% o fusnesau yn goroesi eu blwyddyn gyntaf a 52.8% yn goroesi eu pum mlynedd gyntaf, a dyma'r ffigurau gorau yng Nghymru.



CYRHAEDDIAD ADDYSGOL RHAGOROL

Mae gan 78.7% o'r boblogaeth gymwysterau lefel NVQ, sy'n llawer uwch na chyfartaledd Cymru o 74.0%.



DIBYNIAETH AR Y SECTOR GWASANAETHU

O'r 30,900 o bobl mewn gwaith, mae amcangyfrif o 74.4% (23,000) wedi eu cyflogi yn y sectorau gwasanaethu.



COSTAU YNNI UWCH OND TWF O RAN YNNI ADNEWYDDADWY

Er bod prisiau ynni yn uwch yng Ngheredigion, mae gan y sir y ganran uchaf o ran defnydd o drydan sy'n cael ei fodloni trwy gynhyrchu trydan adnewyddadwy.

Beth yw'r problemau y mae angen i ni fynd i'r afael â nhw?

Mae Ceredigion yn sir hyderus a deniadol lle mae llawer o'n pobl yn ffynnu ac yn datblygu, lle mae llawer wedi sefydlu busnesau llwyddiannus sy'n ffynnu, a lle mae llawer o bobl yn hoffi ymweld. Mae gennym aer glân, lefelau gwych o fioamrywiaeth a thirwedd naturiol i genfigennu wrthi.

Mae'r potensial gennym i dyfu ymhellach, ac mae angen i ni fynd i'r afael â nifer o heriau sylfaenol allweddol os ydym yn mynd i wireddu ein potensial llawn.

Ers y cyfrifiad diwethaf yn 2011, mae poblogaeth Ceredigion wedi lleihau'n sylweddol, yn enwedig yn y proffil oedran 16-64. Yn gryno, mae pobl ifanc wedi allfudo o Geredigion, yn rhannol o ganlyniad i ostyngiad i nifer y swyddi sector cyhoeddus, sydd wedi bod yn rhan bwysig o economi Ceredigion erioed.

Oherwydd hyn, her arall yw tyfu maint, amrywiaeth a chydnerthedd y sector preifat yng Ngheredigion. Mae angen i ni weld mwy o fusnesau yn cychwyn, a mwy o'n micro-fusnesau a busnesau bach yn tyfu.

Hefyd, bydd angen i economi Ceredigion addasu i newidiadau a heriau allweddol yn sgil penderfyniad y DU i ymadael â'r UE.

I gefnogi poblogaeth a fydd yn tyfu yn y dyfodol, mae angen i ni allu parhau i fuddsoddi yn ein lleoedd, gan eu gwneud yn ddeniadaol ac yn fforddiadwy i'n pobl fyw a gweithio ynddynt, ochr yn ochr â thyfu'r economi ymwelwyr yn gynaliadwy.

Ein gweledigaeth a'n gwerthoedd

Gan adeiladu ar ein cryfderoedd, byddwn yn gweithio ar y cyd i roi mesurau ar waith i wrthdroi tueddiadau diweddar yn ein heconomi, gan fynd i'r afael â'n heriau allweddol i wireddu gweledigaeth o economi sy'n darparu dyfodol cynaliadwy i bawb sy'n dewis byw a gweithio yma.

Wrth baratoi'r fframwaith strategol hwn, rydym wedi siarad â llawer o bobl sy'n byw ac yn gweithio yng Ngheredigion ac sy'n rhedeg busnesau a sefydliadau yma. Yn gyfunol, rydym yn rhannu gweledigaeth debyg ac mae gennym lawer o werthoedd yn gyffredin. Bydd y gwerthoedd hyn yn ysgogi ein dull o ddatblygu a thyfu ein heconomi yn ystod y 15 mlynedd nesaf.


Mae pobl a busnesau Ceredigion yn rhai **Cydnherth**, a bydd angen iddyn nhw barhau i fod felly i ymateb i'r heriau sy'n ein hwynebu yn ein heconomi, ein hinsawdd a'n cymunedau. Mae angen i ni sicrhau cydnherthedd ar draws ein holl sectorau i dyfu'n llwyddiannus ac yn gynaliadwy.

Rydym yn **Anelu'n uchel**. Mae gennym sylfeini cadarn – yn ein heconomi, ein haddysg, ein hamgylchedd, ein traddodiadau a'n diwylliant, a gallwn weld cyfleoedd i adeiladu ar y rhain mewn ffordd sy'n cynnig rhagolygon arloesol, realistig a chyffrous ar gyfer y dyfodol i'r rhai sydd eisiau bod yn rhan ohono.

Mae Ceredigion yn sir sy'n **Rhwydweithio** a bydd yn parhau felly – bydd yn tyfu'r economi trwy wrando ar anghenion ei phobl a deall yr anghenion hyn, gan hefyd ofalu am ei hamgylchedd a'i chymunedau.

Mae gan Geredigion lawer o nodweddion **Unigryw** ac mae'n bwysig ein bod yn clodfori'r rhain ac yn eu defnyddio i greu cyfleoedd newydd.

Mae'r 4 o werthoedd hyn, a grynoir yn y geiriau allweddol - Cydnherthedd, Anelu'n uchel, Rhwydweithio ac Unigryw, yn sillafu **CARU**. Mae Caru Ceredigion yn rhan o hunaniaeth brand yr ydym yn gobeithio y bydd pawb sy'n adnabod Ceredigion yn gallu teimlo cysylltiad â hi.



Sut y mae angen i'r dyfodol edrych

Bydd Ceredigion yn magu **hyder** wrth iddi ddefnyddio ei hasedau – naturiol, ffisegol a phobl – yn gynyddol i ddatblygu a thyfu'r economi.

Bydd mwy o gyfleoedd yn cael eu creu gan fusnesau presennol a newydd i bobl o bob oed.

Bydd mwy o fusnesau'n cael eu sefydlu a bydd busnesau'n tyfu, gan fwynhau'r amgylchedd cadarnhaol ar gyfer twf yma yng Ngheredigion.

Bydd twf economaidd yn cael ei sicrhau'n gynaliadwy – gan hefyd barhau i chwarae ein rhan mewn ymdrin ag achosion ac effeithiau'r newid yn yr hinsawdd a helpu ein cymunedau i ffynnu ar draws Ceredigion gyfan.

Bydd arloesedd wedi'i arwain gan fenter yn arwain at gyfleoedd gwaith newydd i bobl ifanc medrus sy'n cael eu haddysgu a'u hyfforddi yn ein hysgolion, ein colegau a'n prifysgolion.

Bydd pobl ifanc sy'n dymuno aros yng Ngheredigion, yn ogystal â'r rhai a allai fod eisiau dychwelyd i fyw a gweithio yma neu symud yma am y tro cyntaf, yn gweld Ceredigion fel lle llawn cyfleoedd. Bydd hyn yn sicrhau bod ein cymunedau yn dal i fod yn lleoedd bywiog lle gall ein diwylliant a'n hiaith Gymraeg ffynnu.



Cyd-destun a Chwmpas Strategol

Y cyd-destun polisi ar gyfer datblygu'r strategaeth

Polisiau a Strategaethau Cenedlaethol. Nod y strategaeth hon yw cyd-fynd yn llwyr â'r cyd-destun polisi cenedlaethol trwy hybu twf cynhwysol cynaliadwy sy'n flaenoriaethau i Lywodraethau Cymru a'r DU. Mae'n cyd-fynd yn agos â'r polisi cenedlaethol a amlinellir yn *'Ffyniant i Bawb'* a Deddf Llesiant Cenedlaethau'r Dyfodol o ran ein dyheadau carbon isel a'n cynllun gweithredu economaidd.

Rhaglenni Rhanbarthol. Mae'r strategaeth hon yn cyd-fynd yn agos â'r blaenoriaethau newydd sy'n deillio o'n partneriaeth gyda Chyngor Powys a phartneriaid ehangach yn rhan o Tyfu Canolbarth Cymru – a bydd yn helpu i hysbysu'r Fframwaith Economaidd Rhanbarthol newydd i gefnogi ei ddarpariaeth yn lleol.

Cynllun Corfforaethol. Mae Cyngor Sir Ceredigion wedi nodi'n flaenorol yr heriau sy'n wynebu economi Ceredigion a'r cyfleoedd lawer sydd ganddo i ddarparu sail ar gyfer twf cydnherth yn y dyfodol. Dyna pam mae wedi nodi Rhoi Hwb i'r Economi fel ei flaenoriaeth gyntaf yn y Cynllun Corfforaethol cyfredol.

Cyd-fynd â strategaethau eraill

Bydd y strategaeth hon yn dylanwadu ar lawer o strategaethau a chynlluniau eraill sy'n cael eu llunio a'u darparu gan Gyngor Sir Ceredigion. Bydd darpariaeth y strategaeth hon hefyd yn cael ei dylanwadu gan strategaethau sy'n cael eu datblgu a'u rheoli gan Gyngor Sir Ceredigion a rhanddeiliaid allweddol eraill gan gynnwys Llywodraeth Cymru.

Addysg / Sgiliau. Bydd ein gallu i gynhyrchu twf economaidd yng Ngheredigion yn dibynnu ar fod â gweithlu brwdfrydig ac amryddawn i weithio yn y mentrau a fydd yn ysgogi'r twf hwnnw. Bydd strategaethau a chynlluniau gwasanaeth addysg Cyngor Sir Ceredigion, a rhai sefydliadau addysg Bellach ac Uwch sy'n gweithredu yng Ngheredigion yn ddylanwadol. Byddwn hefyd yn gweithio gyda sefydliadau eraill sy'n darparu hyfforddiant, sgiliau a mynediad at brentisiaid, i sicrhau bod anghenion cyflogwyr yng Ngheredigion yn cael eu deall a'u diwallu.

Tai. Mae *'Tai i Bawb'* – Strategaeth Dai Leol Ceredigion yn nodi sut y bydd anghenion tai holl drigolion Ceredigion yn cael eu diwallu. Ategir y strategaeth gan gynlluniau gweithredu a fydd yn rhoi sylw i ddynmeg ac anghenion newidiol y boblogaeth. Bydd ysgogwyr economaidd newidiol yn hysbysu'r cynlluniau gweithredu hyn.

Cynllunio. Gellir sicrhau twf economaidd dim ond pan fydd y seilwaith ategol ar gyfer y twf hwnnw wedi'i sefydlu. Mae hynny'n golygu'r angen i ddarparu safleoedd ac eiddo cyflogaeth strategol, tai ac i ystyried sut y datblygir ein trefi. Bydd darpariaeth y strategaeth hon yn cael ei dylanwadu gan y Cynllun Datblygu Lleol (CDLI). Bydd y CDLI a'i weithrediad hefyd yn cael ei ddylanwadu gan anghenion newidiol y strategaeth economaidd, yn ogystal â'r Fframwaith Datblygu Cenedlaethol newydd.

Seilwaith. Bydd ein gallu i dyfu'r economi yng Ngheredigion yn cael ei gyfyngu heb ddatblygu seilwaith sylfaenol ffyrdd, cysylltedd digidol ac ynni. Mae gan sefydliadau allweddol eraill dan sylw, yn enwedig Llywodraeth Cymru a darparwyr rhwydweithiau yn achos darparwyr ynni a chysylltedd digidol, strategaethau a chynlluniau gweithredu ar waith i ddiwallu'r anghenion seilwaith hyn. Bydd ein strategaeth economaidd yn hysbysu'r strategaethau ategol hynny.

Strategaethau sectorol a phwnc. Bydd strategaethau lleol a chenedlaethol eraill sy'n rhoi sylw i feysydd buddiant a chyfle penodol yn dylanwadu'n uniongyrchol ar ein llwyddiant o ran tyfu'r economi yma. Mae enghreifftiau'n cynnwys strategaethau ar gyfer y sectorau Bwyd a Ffermio, strategaethau a chynlluniau adfywio canol trefi, strategaethau ymchwil a datblygu ac arloesi. Byddwn yn nodi ac yn manteisio ar yr holl gyfleoedd i gyfateb ein hanghenion a'n strategaethau â'r rhai ar lefelau rhanbarthol a chenedlaethol.



A wyddech chi?

O'r 30,900 o bobl sydd mewn gwaith yng Ngheredigion, cyflogir 74% yn y sectorau gwasanaethu, 12.9% yn y diwydiant twristiaeth, a 9.7% yn y diwydiannau cynhyrchu ac adeiladu.



Egwyddorion ac Ysgogwyr Allweddol

Egwyddorion sy'n sail i'r strategaeth

Cyfle – ysgogir y strategaeth gan y cyfleoedd sy'n bodoli i dyfu'r economi. Trwy weithio mewn partneriaeth, gallwn greu gyda'n gilydd yr amodau ar gyfer **twf cynaliadwy**. Rydym yn cydnabod y cyfleoedd sydd gennym i dyfu'r economi, ond rydym hefyd yn cydnabod y ffactorau bywyd yng Ngheredigion sy'n ei gwneud yn ardal lle mae pobl yn hoffi byw – ardal werdd a glân sydd eisoes yn cyfrannu at leihau effeithiau'r newid yn yr hinsawdd.

Mae diogelu a gwella ein tirwedd a'n bioamrywiaeth a lleihau achosion niweidiol y newid yn yr hinsawdd ymhellach yn egwyddor craidd. Yn gysylltiedig â hyn, mae gennym ymrwymiad ac angen i **ddatgarboneiddio** ein heconomi. Bydd hon yn egwyddor sylfaenol arall i'r strategaeth. Byddwn yn manteisio ar bob cyfle i ddatblygu ffyrdd i dyfu mewn ffordd sydd hefyd yn tynnu carbon allan o'r atmosffer. Byddwn hefyd yn manteisio ar y cyfle sydd gennym i helpu mentrau yng Ngheredigion i ddatgarboneiddio.

Byddwn yn ceisio gweithredu'r egwyddor o gael ein **harwain gan gyflogwyr** er mwyn ysgogi arloesedd a'r agenda sgiliau, i greu'r amodau i greu **swyddi o werth uwch** yn yr economi. Bydd hyn yn cael ei gyflawni mewn nifer o ffyrdd, ac nid yw wedi'i gyfyngu i sectorau neu fathau o swyddi penodol. Mae'n golygu creu rhai cyfleoedd cyflogaeth mewn busnesau sydd mewn sectorau gwerth uwch yn gysylltiedig â'r sectorau economi ymchwil a gwybodaeth y mae gennym fantais gystadleuol ynddynt, er enghraifft amaeth-dechnoleg, biowyddoniaeth, technoleg sbectrwam ac awyrfod. Mae hefyd yn golygu y bydd mentrau yn yr economi sylfaenol yn dod yn fwy cynhyrchiol a chystadleuol, ac yn tyfu i alluogi datblygiad llwybrau gyrfaol sy'n arwain at gyfleoedd gwaith â chyflogau uwch.

Diben y strategaeth yw cynyddu ffyniant yng Ngheredigion. Byddwn yn ystyriol o'r angen i sicrhau en bod yn mynd ati i hybu **ffyniant cyffredin**. Mae hyn yn golygu sicrhau twf sy'n cyfrannu at gynyddu ffyniant mewn cymunedau ar draws tri rhanbarth Ceredigion. Mae hefyd yn golygu cyflawni uchelgais o gau'r bwlch ffyniant ariannol â chyfartaleddau Cymru a'r DU.

Egwyddor sylfaenol bwysig arall yw'r angen i ddiogelu a gwella ein hunigrywedd a'n hunaniaeth diwylliannol, a helpu i roi hwb i gydnerthedd a thwf **y Gymraeg**. Byddwn yn adeiladu ar waith a wnaed yn rhan o brosiect Arfor i nodi'n llawn y cyfleoedd i wireddu cyfleoedd i helpu'r Gymraeg i ffynnu trwy gamau datblygu economaidd cadarnhaol. Yn ei hanfod, bydd hyn yn cael ei gyflawni trwy sicrhau bod gan y rhai sy'n siarad Cymraeg yr hyder, y sgiliau a'r cyfleoedd i ddatblygu busnesau, i weithio mewn swyddi o werth uwch, ac i weld Ceredigion fel lle ffyniannus ac egniol i fyw a gweithio ynddo.

Mae'r egwyddorion hyn yn parhau i fod yn berthnasol nawr wrth i'r economi addasu i heriau Covid a Brexit.

A wyddech chi?

Mae tua 285 o fusnesau yn y sector Gweithgareddau Proffesiynol, Gwyddonol a Thechnegol yng Ngheredigion, sy'n cynnwys ymchwil a datblygu gwyddonol. Mae'r sector hwn yn tyfu ac wedi'i gyfuno â'n heconomi wybodaeth gref, mae'n creu'r amodau ar gyfer swyddi â chyflog uwch a thwf economaidd.



Y diwydiannau amaethyddiaeth, coedwigaeth a physgota yw tua 4.5% o'r mentrau yn economi Ceredigion



Cacennau cartref Ridiculously Rich yw un o hanesion o lwyddiant entrepreneuriaeth yr economi leol ac fe'u dosberthir i bob cwr o'r DU

Yr hyn a ddywedaso chi wrthym...



Rhestrir y prif themâu o'n gwaith ymchwil ac ymgynghori isod. Fe'u defnyddiwyd i lunio'r Strategaeth Economaidd i helpu i bennu ein blaenoriaethau i dyfu economi Ceredigion dros y pymtheg mlynedd nesaf. Gellir eu grwpio o dan y pedair blaenoriaeth ganlynol:



Pobl

- Gostyngiad i'r boblogaeth oedran gweithio (16-64) a chynnydd i'r boblogaeth 65+
- Cynnydd i gymudo o'r ardal dros y pum mlynedd diwethaf
- Lefel cyrhaeddiad addysg uchel
- Cadarnle'r Gymraeg a diwylliant Cymru
- Trydydd Sector a chyfraddau gwirfoddoli cryf



Lleoedd

- Heriau natur wledig – amddifadedd, mynediad at wasanaethau, costau ynni uwch a thai fforddiadwy
- Ansawdd bywyd uchel a lle diogel i fyw ynddo
- Amgylchedd naturiol hardd ac o bwysigrwydd gwyddonol
- Safleoedd cyflogaeth ffyniannus a arweinir gan anghenion
- Trefi fel manau byw, gweithio a hamdden ffyniannus

Nodi'r Blaenoriaethau hyd at 2035

Ceir llawer o heriau a chyfleoedd yr ydym i gyd yn cytuno sy'n flaenoriaethau i'r economi leol yn y dyfodol. Yn seiliedig ar ganfyddiadau ein gwaith ymchwil byddwn yn canolbwyntio ein hymdrechion datblygu economaidd ar gefnogi'r themâu allweddol canlynol:



Menter

- Gor-ddibyniaeth ar micro-fentrau a mentrau bach, a diffyg mentrau canolig eu maint – y 'canol coll' fel y'i gelwir
- Enillion isel o'i gymharu â Chymru yn ei chyfanrwydd
- Dibyniaeth ar gyflogaeth sector cyhoeddus a'r sector gwasanaethu yn gyffredinol
- Denu mentrau newydd a hyrwyddo Ceredigion fel lle i gyflawni busnes, i ymweld ag ef, ac i'w fwynhau
- Creu cyfleoedd i gadw pobl ifanc yn y sir a chadw eu sgiliau yn y gweithlu
- Denu swyddi ychwanegol a rhai â chyflogau uwch
- Cymorth i fusnesau newydd a phresennol
- Sector gwybodaeth cryf yn y sir
- Llai o fyfyrwyr ond cyfraddau bodlonrwydd uchel
- Cyfraddau goroesi da i fentrau newydd



Cysylltedd

- Band eang a chysylltedd symudol yn gwella
- Ond mae angen rhagor o fuddsoddiad a datblygiad mewn seilwaith digidol i gynorthwyo mentrau a mynediad defnyddwyr at wasanaethau
- Datblygu seilwaith trafnidiaeth ffisegol – ffyrdd, rheilffyrdd a chludiant cyhoeddus
- Amseroedd cymudo uwch na'r cyfartaledd i weithwyr
- Tybiaeth nad yw Ceredigion wedi ei 'chysylltu'
- Sector ynni adnewyddadwy sy'n tyfu

Mae ein Pwyslais ar...

Pobl Lleoedd Menter a Chysylltedd



Ynglŷn â Cheredigion

Rhai ffeithiau allweddol am ein sir...



Pobl

Poblogaeth: **72,992**

Poblogaeth 65 oed a hŷn: **24.9%**

Poblogaeth ag anabledd: **10.0%**

Oed cyfartalog: **46.1**

Siaradwyr Cymraeg: **47.3%**



Lleoedd

Maint y sir: **1,900 km²**

Ardaloedd Cadwraeth Arbennig: **14**

Aelwydydd: **31,500**

Dwysedd: **0.4 person yr hectar**



Menter

Nifer y mentrau gweithredol: **2,810**

Cyfradd oroesi mentrau newydd: **97.2%**

Diwydiant mwyaf: **Addysg (15.4%)**

Cyfradd cyflogaeth: **66.1%**



Cysylltedd

Y defnydd o gar/fan: **86.1%**

Pellter cyfartalog i'r gwaith: **21.3cm**

Band eang gwibgyswllt ar gael: **20%**



Cefnogi ein Sectorau Allweddol

Mae Ceredigion wedi bod yn economi a seiliwyd ar swyddi **sector cyhoeddus** yn draddodiadol. Mae sefydliadau Addysg Uwch allweddol yn Aberystwyth a Llanbedr Pont Steffan wedi bod yn gyflogwyr pwysig ac yn ysgogwyr yr economi yn ogystal â sefydliadau allweddol eraill fel y Llyfrgell Genedlaethol a'r Awdurdod Lleol.

O ran swyddi **sector preifat**, amaethyddiaeth fu asgwrn cefn yr economi wledig a chymunedau Ceredigion. Mae'n dal i fod yn sector pwysig, ac felly hefyd y sector twristiaeth, sydd bellach yn cyflogi dros 7,000 o bobl yn y sir, o gynnwys y rhai sy'n cymryd rhan mewn gweithgareddau twristiaeth, llety a gwasanaethau bwyd.

Mae'r 4,000 o bobl sy'n gweithio ym maes **masnach cyfanwerthu a manwerthu** yn cyfrannu at y cyfanswm o 74% o'r boblogaeth weithio a gyflogir yn y sectorau gwasanaethu. Bydd rhai meysydd cyflogaeth yn y sector hwn (gan gynnwys manwerthu) yn parhau i wynebu heriau, tra bod eraill yn cynnig cyfleoedd cynyddol. Yn nodedig, cyflogir 1,600 o bobl mewn gweithgareddau proffesiynol, gwyddonol a thechnegol, gan fanteisio ar wybodaeth, sgiliau a chryfderau newydd yn ogystal â rhai traddodiadol. Mae sectorau allweddol sydd wedi dod i'r amlwg ac sy'n cynyddu o ran pwysigrwydd yn cynnwys gwyddorau Amgylcheddol a Phlanhigion, Awyrfod, gwyddor Biofeddygol ac Amaeth-dechnoleg. Mae lleoliadau allweddol yn cynnwys Aberystwyth ac Aberporth.

Er bod gan Geredigion sector **gweithgynhyrchu** bach, mae ganddi bresenoldeb sylweddol o fusnesau gweithgynhyrchu bwyd mewn safleoedd strategol yn Aberystwyth a Dyffryn Aeron, tra bod nifer gynyddol o fusnesau gweithgynhyrchu bwyd bach ac arloesol hefyd yn bodoli.

Mae'r **Economi Sylfaenol**, gan gynnwys y sectorau manwerthu, amaethyddiaeth, gwasanaethau bwyd, adeiladu a gofal hefyd yn ysgogwyr allweddol yr economi, yn ogystal â thrydydd sector sy'n ffynnu.

Mae Ceredigion yn gartref i **economi celfyddydau a diwylliant fywiog**, sy'n cyflogi dros 400 o bobl. Yn ogystal â Llyfrgell Genedlaethol Cymru a Chanolfan y Celfyddydau yn Aberystwyth, ceir canolfannau allweddol yn ardal y canolbarth a'r de, a chynlluniau ar gyfer tyfu'r sector yn y dyfodol gyda chynlluniau fel yr Hen Goleg yn Aberystwyth ar fin gwneud cyfraniad gwirioneddol at dyfu'r sector.

Yr hyn y byddwn ni'n ei wneud

Byddwn yn gweithio gyda'n partneriaid allweddol i helpu i gynyddu cyfleoedd gwaith yng Ngheredigion.

Bydd hyn yn cael ei wneud yn bennaf trwy dyfu nifer y busnesau yng Ngheredigion, a hefyd tyfu nifer y bobl a gyflogir gan ein busnesau. Efallai y byddwn hefyd yn gweld rhywfaint o dwf o ganlyniad i fentrau'r sector cyhoeddus – yn enwedig cyflwyno'r buddsoddiadau mewn cyfleusterau Ymchwil a Datblygu mewn sectorau allweddol, gan gynnig cyfleoedd ar gyfer gweithgynhyrchu uwch a chyfleoedd eraill sy'n seiliedig ar ymchwil a datblygu.

Bydd twristiaeth yn parhau i chwarae rhan allweddol o ran tyfu ein heconomi. Bydd buddsoddiadau mewn cyfleusterau allweddol, gan gynnwys yr harbyrau a chyfleusterau eraill o ansawdd uchel, digwyddiadau a sefydliadau twristiaeth bwyd yn cynyddu gwariant ymwelwyr ac yn mynd i'r afael â'r natur dymhorol.

Bydd yr economi sylfaenol yn parhau i fod yn bwysig, a byddwn yn ceisio ehangu a chryfhau'r rhan honno o'n

heconomi trwy ddod o hyd i ffyrdd newydd o annog gweithgarwch newydd ac arloesol yn barhaus, a fydd yn helpu ein pobl, ein busnesau a'n lleoedd i ddatblygu a ffynnu.

Rydym yn rhagweld y bydd y trydydd sector (mentrau cymunedol a chydweithredol) hefyd yn chwarae rhan allweddol mewn twf yn y dyfodol trwy sicrhau bod gan y twf sail eang a'i fod yn gynhwysol.

Sut y gallai'r dyfodol edrych

Bydd Ceredigion yn manteisio ar gryfderau ei sectorau craidd yn yr economi sylfaenol a'r diwydiannau ymchwil uwch / seiliedig ar wyddoniaeth, i greu cyfleoedd gwerth uchel wedi'u harwain gan gyflogwyr i'w gweithlu cynyddol fedrus. Bydd Ceredigion yn parhau i fod yn lle deniadol i fyw a gweithio ynddo ac ymweld ag ef, gyda manau diddorol lle mae diwylliant a'r Gymraeg yn ffynnu, a fydd yn cadw ei unigrywedd a'i apêl fel lle gwych i fod ynddo.



Mae Canolfan Bwyd Cymru yn Llandysul yn ganolfan technoleg fwyd benodedig sy'n cynnig cyngor, gwasanaethau technegol a hyfforddiant i fusnesau newydd sbon, BBaChau a gweithgynhyrchwyr bwyd presennol



Blaenoriaeth 1: Pobl

Byw, gweithio a thyfu yng Ngheredigion

Ein huchelgais ar gyfer y dyfodol

Mae Ceredigion yn lle i fyw lle gellir cael boddhad mewn bywyd, a lle gellir gwredu uchelgeisiau proffesiynol gan fwynhau profiadau bywyd o ansawdd gwirioneddol.

Ein huchelgais yw gweld pobl ifanc sy'n dymuno aros a datblygu gyrfa yng Ngheredigion yn cael gwredu'r cyfleoedd i wneud hynny.

Hoffem i'r Sir fanteisio ar brofiad, sgiliau a gwybodaeth pobl sydd wedi gadael Ceredigion a bellach eisiau dychwelyd i fyw, creu busnes newydd a / neu weithio yma.

Gall Ceredigion ddod yn gyrchfan fwy deniadol fyth i ymwelwyr â'r ardal, ac i bobl sy'n dymuno symud yma i astudio, i fyw ac i weithio. Rydym hefyd eisiau manteisio ar sgiliau ac uchelgeisiau pawb sy'n byw yng Ngheredigion ac sy'n symud yma i astudio a gweithio. Yn syml, rydym yn dymuno i Geredigion fod yn lle ar gyfer twf cynhwysol.

Ein huchelgais yw gwrthdroi'r gostyngiad i'r boblogaeth ifanc ac o oedran gweithio, ac rydym eisiau gweld pobl Ceredigion yn gallu mynegi eu hunigrywedd yn hyderus mewn cymunedau cryf o ran hunaniaethau, diwylliant ac iaith.

“Ein huchelgais yw gweld pobl ifanc sy'n dymuno aros a datblygu gyrfa yng Ngheredigion yn cael gwredu'r cyfleoedd i wneud hynny”

Ble ydym ni nawr?

Ceir tybiaeth ymhlith rhai mai prin yw'r cyfleoedd proffesiynol i bobl ifanc ddilyn gyrfa llawn boddhad yng Ngheredigion, ac mai'r unig ddewis yw symud o'r ardal i astudio, byw a gweithio. Er y bydd rhai yn symud i wireddu eu dyheadau astudio a gyrfaol i ffwrdd o'r fan yma, ceir cyfleoedd gwirioneddol i'r rhai sy'n dymuno aros.

Mae cyflogwyr yng Ngheredigion angen pobl sydd â'r sgiliau priodol i lenwi swyddi gwag sy'n cynnig cyfleoedd gyrfaol hirdymor.

Ystyrir Ceredigion gan lawer hefyd fel lle gwych i gychwyn busnes, gan fwynhau hefyd y manteision niferus a geir o fyw yng Ngheredigion.

I gyflawni ein huchegleisiau, mae'n rhaid i ni sicrhau bod mwy o bobl o bob oed yn ymwybodol o'r cyfleoedd gwirioneddol i ddatblygu yma. Hefyd, bydd angen i ni sicrhau y gallwn ddarparu hyfforddiant i bobl o bob oed fel y gall cyflogwyr ysgogi twf economaidd Ceredigion drwy eu gweithwyr.

Mae angen i ni sicrhau bod angen pobl am dai, cysylltodd a chyfleoedd cymdeithasol yn cael ei ddiwallu.

Gyda'n gilydd, gallwn fod yn ffyddiog y gall Ceredigion ysbrydoli pobl ac y gallwn fod yn uchelgeisiol.

Beth yw twf cynhwysol?

I Geredigion, mae hyn yn golygu gwredu'r potensial i bawb sy'n byw ac yn gweithio yng Ngheredigion ac yn ymweld. Wrth i ni dyfu, dylai'r holl bobl yng Ngheredigion gael y cyfle i rannu'r manteision.



Mae Ceredigion yn cynnig ansawdd bywyd uchel i drigolion ac ymwelwyr

A wyddech chi?

Mae gan boblogaeth Ceredigion lefelau sgiliau llawer uwch na'r cyfartaledd – mae gan dros 78% gymwysterau NVQ Lefel 2, sy'n uwch na'r cyfartaledd cenedlaethol o 74%.



Blaenoriaeth 1: Pobl

Byw, gweithio a thyfu yng Ngheredigion

Yr hyn y mae angen i ni ei wneud

Mae gennym ni system addysg ragorol sy'n sicrhau canlyniadau rhagorol i ddysgwyr. Byddwn yn gweithio gyda darparwyr addysg yng Ngheredigion i greu cysylltiadau mwy cadarn gyda chyflogwyr, fel bod gwasanaethau addysg a hyfforddiant yn cyd-fynd yn bendant ag anghenion y cyflogwyr hynny.

I fynd i'r afael â'r dybiaeth o ddiffyg cyfleoedd yng Ngheredigion, byddwn yn gweithio i godi ymwybyddiaeth o'r amrywiaeth o lwybrau gyrfaol llawn boddhad sydd ar gael yng Ngheredigion.

Byddwn yn archwilio ffyrdd, gan weithio gyda'n partneriaid, i sicrhau bod ein mentrau yn gwybod y gallant gael mynediad at gronfa o bobl sydd â'r sgiliau priodol i alluogi twf. Bydd pobl ifanc sy'n byw ac yn astudio yng Ngheredigion yn ymwybodol o ehangder a chwmpas y cyfleoedd hynny, ac yn gwybod sut i fanteisio arnynt.

Byddwn hefyd yn gweithio gyda'n partneriaid i helpu i wireddu potensial pawb sy'n byw ac yn gweithio yng Ngheredigion. Bydd pobl â sgiliau a phrofiad a enillwyd mewn mannau eraill yn gweld Ceredigion fel man lle gellir rhoi'r sgiliau hynny at ddefnydd da. Bydd Ceredigion yn cael ei hystyried fel lle gwyd i gychwyn a thyfu busnes, gyda rhwydwaith ffurfiol ac anffurfiol o gymorth sy'n helpu pobl a mentrau i lwyddo.

Byddwn yn adeiladu ar y gwaith a wnaed trwy Arfor a mentrau eraill sydd â'r nod o ddeall sut y gallwn ddatblygu'r economi mewn ffordd sy'n helpu i roi hwb i nifer y siaradwyr Cymraeg yng Ngheredigion.

Diben hyn fydd cadw pobl ifanc (a anwyd yma neu sydd wedi symud i astudio yma) yng Ngheredigion, gan ddenu eraill yn ôl i'r sir, a chynnig y cyfle i eraill ddysgu a bod yn hyderus wrth ddefnyddio'r iath.

Pwy sydd angen cymryd rhan?

Byddwn yn gweithio mewn partneriaeth ag amrywiaeth o bobl a sefydliadau ar lefelau lleol, rhanbarthol a chenedlaethol.

Bydd Gwasanaeth Addysg Ceredigion a sefydliadau Addysg Uwch yng Ngheredigion yn bartneriaid craidd o ran cyflawni ein huchelgeisiau.

Bydd gwasanaethau eraill yng Nghyngor Sir Ceredigion yn chwarae rhan hefyd, gan gynnwys Gwasanaeth Pobl a Threfniadaeth y Cyngor a Cered.

Bydd Llywodraeth Cymru, ei hadrannau perthnasol a chyrrff a ariennir ganddi yn bartneriaid allweddol.

Bydd darparwyr addysg a hyfforddiant sector preifat a thrydydd sector yn bartneriaid allweddol hefyd, yn ogystal â chyrrff sector cyhoeddus perthnasol eraill a ariennir, fel Gyrfa Cymru.

Byddwn yn gweithio'n agos gyda Phartneriaeth Dysgu a Sgiliau Rhanbarthol newydd Canolbarth Cymru.

Yn bwysig, bydd hon yn agenda sgiliau a arweinir gan gyflogwyr, felly bydd ein cyflogwyr yn rhan o'r gwaith o'i llunio a'i darparu.

Byddwn hefyd yn gweithio gydag unigolion a all helpu i fentora, ysbrydoli, hyfforddi a chefnogi ein pobl mewn ffyrdd eraill i wireddu eu potensial yn llawn.

Astudiaeth Achos: Osian a Catrin, Caffi a Becws CRWST, Aberteifi

Roedd gan Osian a Catrin freuddwyd o fod yn berchen ar gaffi a becws. Fe wnaethant symud yn ôl i'r gorllewin a chael eu hysbrydoli i bobi bara a chacennau crefftus i'w gwerthu yn y farchnad leol wythnosol yn Aberteifi ynghyd â chyflenwi chwe siop leol. Yn 2018 agorodd CRWST yn Aberteifi ei ddrysau, gan weini brunch, bara, danteithion pob a choffi.

Yn fuan, yn sgil llwyddiant eu cynhyrchion aethant ati i sefydlu lleoliad ar wahân ar gyfer y becws. Fodd bynnag, nid yw bod yn entrepreneur byth yn hawdd! Daeth Covid-19 â'i heriau ei hun gydag Osian a Catrin yn gorfod addasu eu model busnes - symud ar-lein, dosbarthu o ddrws i ddrws a chreu citiau pobi gartref.

"Rydyn ni mor falch ein bod ni wedi cymryd y cyfle hwn a dilyn ein breuddwydion. Yr allwedd i lwyddiant ein busnes yw ein brwdfrydedd dros gynhyrchu'r bwyd gorau, i barhau i fod yn arloesol wrth ddatblygu ein busnes a'r gefnogaeth barhaus gan bobl leol a thwristiaid."



Blaenoriaeth 1: Pobl

Byw, gweithio a thyfu yng Ngheredigion

Yr hyn yr ydym ni eisiau ei gyflawni

Beth fydd yn cael ei wneud?

Sut y byddwn yn mesur cynnydd?

Pwy fydd yn cymryd rhan?

Erbyn pryd y bydd hyn yn cael ei gyflawni?

Creu cysylltiadau cryfach rhwng cyflogeion y dyfodol a chyflogwyr.	Datblygu rhaglen profiad gyrfaol a arweinir gan gyflogwyr, gan gynnig cyfleoedd i gyflogwyr a'u darparu gyflogeion ddatblygu perthynas.	Nifer y cyflogwyr sy'n cymryd rhan Nifer y disgyblion a'r myfyrwyr sy'n cymryd rhan Mwy o ymwybyddiaeth o gyfleoedd a gofynion sgiliau	Busnesau / Cyflogwyr yng Ngheredigion CS Ceredigion Ysgolion, Colegau, Prifysgolion a darparwyr Sgiliau	Lansio yn 2021 Cwbl weithredol erbyn 2023
Gweithlu medrus ac arloesol a arweinir gan gyflogwyr	Cynorthwyo datblygiad a gweithrediad Partneriaeth Sgiliau Rhanbarthol newydd Canolbarth Cymru Ymchwilio i sefydlu 'Cronfa dalent Ceredigion'	Nifer y myfyrwyr â chymwysterau perthnasol Tystiolaeth bod gweithlu â sgiliau priodol ar gael yn well i gyflogwyr	Busnesau / Cyflogwyr yng Ngheredigion CS Ceredigion Ysgolion, Colegau, Prifysgolion a darparwyr Sgiliau	Cyflawni gwelliannau bob blwyddyn o 2021 2022 2021/22
Creu diwylliant sy'n canolbwyntio ar entrepreneuriaeth.	Hyrwyddo Entrepreneuriaeth fel dewis gyrfaol gwirioneddol a allai gynnig boddhad i bobl ifanc yn ogystal ag ail ddewis gyrfa neu ddewis gyrfa yn ddiweddarach mewn bywyd	Nifer y busnesau newydd sbon Y ddarpariaeth o raglenni entrepreneuriaeth Nifer sy'n cymryd rhan mewn rhaglenni	CS Ceredigion Ysgolion, Colegau a Phrifysgolion Darparwyr sgiliau Llywodraeth Cymru / Busnes Cymru Sefydliadau Trydydd Sector	Gweld gwelliannau o 2021
Hyrwyddo Ceredigion fel lle cadarnhaol i fyw, astudio, gweithio a thyfu	Cyflwyno ymgyrch gyfathrebu ragweithiol mewn partneriaeth â phartneriaid perthnasol i hyrwyddo negeseuon cyson am gyfleoedd a gweithgarwch yng Ngheredigion	Sicrhau straeon cadarnhaol yn y cyfryngau yn lleol ac yn genedlaethol.	CS Ceredigion Ysgolion, Colegau a Phrifysgolion Darparwyr sgiliau Llywodraeth Cymru / Busnes Cymru Sefydliadau Trydydd Sector	Lansio'r rhaglen yn 2021
Hyrwyddo cyfleoedd cadarnhaol i bawb fanteisio ar dwf economaidd	Adeiladu ar wersi o gynllun Arfor a gwaith ymchwil perthnasol i greu cyfleoedd i siaradwyr Cymraeg drwy dwf economaidd. Gweithio i hyrwyddo buddion cyflogi gweithlu cynhwysol.	Cynllun gweithredol seiliedig ar werthusiad Arfor. Cynllun cyfathrebu i hyrwyddo cynhwysedd.	Cered Llywodraeth Cymru Partneriaid yn Awdurdodau Lleol Aelodau Fforwm Anabledd Ceredigion	2021 yn barhaus 2021 yn barhaus



Blaenoriaeth 2: Lle Ceredigion Unigryw

Ein huchelgais ar gyfer y dyfodol

Rydym yn dymuno i Geredigion barhau i fod yn fan lle mae pobl eisiau byw a gweithio ynddo ac ymweld ag ef. Yn y dyfodol, bydd angen i Geredigion ddeall anghenion newidiol ei thrigolion, ei gweithwyr a'i hymwelwyr yn ogystal â'r heriau a gynrychiolir gan y newid yn yr hinsawdd y addasu mewn byd sy'n newid.

Yn rhan o'n gweledigaeth, bydd gan Geredigion:

- Dai sy'n diwallu anghenion ei demograffeg sy'n newid
- Safleoedd cyflogaeth strategol a manau gwaith eraill sy'n diwallu anghenion cyflogaeth yn y dyfodol
- Tirwedd a manau gwyrdd sy'n cyfrannu at lesiant pobl a'r blaned
- Trefi sy'n darparu manau byw, gweithio a chymdeithasol sy'n ffynnu
- Asedau naturiol a ffisegol y gall trigolion ac ymwelwyr fanteisio arnynt a'u mwynhau.



Mae byw yn Ceredigion yn cynnig amrywiaeth eang o weithgareddau hamdden

Ble ydym ni nawr?

Yn hanesyddol, mae pobl a mentrau o Geredigion wedi gadael eu hól ar lwyfan y byd yn ddiwylliannol a thrwy arbenigedd ymchwil ac allforio cynhyrchion.

Mae pobl sy'n byw yng Ngheredigion yn rhoi sgôr o 7.8 allan o 10 o ran eu bodlonrwydd mewn bywyd, ac mae 85% yn fodlon neu'n fodlon iawn gyda'r amgylchedd y maent yn byw ynddo. Mae pobl yn cydnabod eu bod yn byw mewn rhan wych o'r byd. Mae dros 2.7 miliwn y flwyddyn o ymwelwyr â Cheredigion hefyd yn dangos pa mor ddeniadol yw'r sir.

Fodd bynnag, ceir heriau, ac mae'n rhaid i ni barhau i ddatblygu ein lleoedd i ddiwallu anghenion cenedlaethau'r dyfodol o drigolion ac ymwelwyr. Mae ein heriau allweddol presennol yn cynnwys:

- Yr angen i ddarparu tai fforddiadwy a hygyrch sy'n diwallu anghenion demograffeg a gweithlu sy'n newid.
- Aildiffinio diben ein canolfannau allweddol yng ngoleuni newidiadau i arferion manwerthu a'r effaith ddilynol ar strydoedd mawr.
- Y ddarpariaeth o gyfleusterau sy'n cynnig adloniant deniadol drwy'r flwyddyn i drigolion ac ymwelwyr.
- Diogelu a gwella ein hasedau naturiol gwyrdd i alluogi pobl i fanteisio arnynt a'u mwynhau, yn ogystal â chyfrannu at y frwydr yn erbyn y newid yn yr hinsawdd.

Astudiaeth Achos: Aberteifi

Mae Aberteifi dros y blynyddoedd diwethaf wedi gweld adnewyddiad yn sgil datblygu nifer o fentrau gyda'r nod o adfywio'r dref a'r ardal gyfagos. Yn arwyddocaol, mae'r rhain yn fentrau sydd wedi'u harwain gan unigolion, sefydliadau a phartneriaethau lleol.

Mae datblygiadau fel trosglwyddo asedau lleol i berchnogaeth gymunedol; mentrau newydd sydd wedi dod i'r amlwg; twf y sector menter gymdeithasol ac adfywiad adeiladau hanesyddol gan gynnwys Neuadd y Dref a Chastell Aberteifi a hynny gan ddefnyddio gwahanol ddulliau o ariannu, i gyd wedi arwain at lwyddiant lleol a mwy o fywiogrwydd yn y dref.

Aberteifi oedd y dref gyntaf yng Ngheredigion i lansio ap a chynllun Wi-Fi trefol ei hun, gan ddangos y gall busnesau lleol, drwy ddefnyddio dadansoddeg, ddod i adnabod eu cwsmeriaid ac addasu i ddiwallu eu hanghenion a'u harferion er budd yr economi lleol.

Mae Aberteifi yn parhau i edrych i'r dyfodol wrth iddi geisio cwrdd â'r heriau a bachu ar y cyfleoedd hynny yn y dyfodol!



Cyhnhelir Marchnad Ffermwrwyr Aberystwyth ar Rodfa'r Gogledd ar Sadwrn cyntaf a thrydydd Sadwrn bob mis



Blaenoriaeth 2: Lle

Ceredigion Unigryw

Yr hyn yr ydym ni eisiau ei gyflawni

Adeiladu ar y cynlluniau lle i nodi a chynnig cyfleoedd i wella mannau byw, gweithio a hamdden mewn trefi ar draws y tri rhanbarth.

Beth fydd yn cael ei wneud?

Adolygu a diweddarau uwchgynlluniau ar gyfer Aberystwyth, a datblygu dulliau tebyg ar gyfer trefi yn rhanbarthau canolbarth a de Ceredigion.

Cyflwyno cynlluniau datblygu ar gyfer yr Harbwr yn Aberystwyth a safleoedd strategol eraill, gan gynnwys hen ddepo bysiau Arriva.

Cyflwyno cynlluniau datblygu ar gyfer Marina yn yr Harbwr yn Aberaeron.

Datblygu cynlluniau a gweithio mewn partneriaeth i ddatblygu Ysgol bwyd crefft, gan gefnogi datblygiad y canolbarth fel canolfan ragoriaeth ar gyfer gwasanaethau bwyd.

Gweithio gyda phartneriaid i nodi cyfleoedd i ddatblygu cyfleusterau sy'n cynnig adloniant i drigolion ac ymwelwyr drwy'r flwyddyn.

Gweithio gyda phartneriaid i nodi ffynonellau cyllid ac i ddenu cefnogaeth i weithgarwch sy'n helpu i ddarparu'r cynlluniau lle.

Gweithio gyda phartneriaid i dyfu effaith y sector celfyddydau a diwylliant fel ysgogwr economaidd a darparwr gweithgarwch hamdden gwyh.

Sut byddwn yn mesur cynnydd?

Cyhoeddi uwchgynllun wedi'i ddiweddarau

Tystiolaeth o gynlluniau yn cael eu cyflwyno ac effaith o ran gwerth buddsoddiadau a swyddi a grëwyd / mentrau a gychwynnwyd

Tystiolaeth o gynlluniau yn cael eu cyflwyno ac effaith o ran gwerth buddsoddiadau a swyddi a grëwyd / mentrau a gychwynnwyd

Tystiolaeth o gynlluniau yn cael eu cyflwyno ac effaith o ran gwerth buddsoddiadau a swyddi a grëwyd / mentrau a gychwynnwyd

Tystiolaeth o lefelau buddsoddiad a ddenwyd i Geredigion

Tystiolaeth o dwf i gyflogaeth, gweithgarwch a gwerth economaidd

Pwy fydd yn cymryd rhan?

- Cynghorau Cymuned / Tref.
- Grwpiau rhanddeiliaid lleol
- Y gymuned fusnes
- Trigolion Ceredigion
- Llywodraeth Cymru a phartneriaid strategol ac ariannu eraill
- Partneriaid darparu perthnasol yn y sectorau cyhoeddus a phreifat a'r trydydd sector yng Ngheredigion

Erbyn pryd y bydd hyn yn cael ei gyflawni?

2022

2023







2022

2022

2023 ac yn barhaus

Yn barhaus o 2021

Yn barhaus o 2021

Yr hyn yr ydym ni eisiau ei gyflawni	Beth fydd yn cael ei wneud?	Sut byddwn ni'n mesur cynnydd?	Pwy fydd yn cymryd rhan?	Erbyn pryd y bydd hyn yn cael ei gyflawni?
Gwneud y mwyaf o gyfleoedd i gynyddu'r ddarpariaeth o gartrefi fforddiadwy	 Datblygu Strategaeth Tai Fforddiadwy sy'n cwmpasu'r defnydd o gyfleoedd cyllido a gynigir trwy Adolygiad Tai Fforddiadwy Llywodraeth Cymru	Nifer y cartrefi fforddiadwy a gwblheir; y cyfleoedd cyllido a sicrhair	Awdurdod Lleol, Landlordiaid Cymdeithasol Cofrestredig, Datblygwyr preifat, Unigolion	2023
Sicrhau bod gan Geredigion safleoedd strategol effeithiol ar gyfer cyflogaeth.	 Gweithio gyda phartneriaid i gyflwyno cynlluniau ar gyfer: <ul style="list-style-type: none"> • Canolfan Gwyddoniaeth / Menter (Campws Arloesi Aberystwyth), â phwyslais ar gwmnïau allgynhyrchu ym meysydd biowyddoniaeth, amaeth-dechnoleg a sbectrwm radio • Buddsoddiad mewn safleoedd cyflogaeth allweddol gan gynnwys Parc Teifi, Parc Menter Llandysul, Parc Bwyd Horeb, Parc Aberporth, Parc Menter Dyffryn Aeron • Buddsoddiadau harbwr strategol yn Aberystwyth, Aberaeron ac Aberteifi.  	Tystiolaeth o gynlluniau yn cael eu cyflwyno ac effaith o ran gwerth buddsoddiadau a swyddi a grëwyd / mentrau a gychwynnwyd Tystiolaeth o fuddsoddiadau ac effaith ddilynol ar fentrau a sefydlwyd a swyddi a grëwyd Tystiolaeth o gynlluniau yn cael eu cyflwyno ac effaith o ran gwerth buddsoddiadau a swyddi a grëwyd / mentrau a gychwynnwyd	Prifysgol Aberystwyth Prifysgol y Drindod Dewi Sant Llywodraeth Cymru Partneriaid buddsoddi sector preifat	2021 2021 ac yn barhaus 2023 ymlaen
Datblygu a gwella asedau gwyrdd Ceredigion	 Parhau i ddenu cyllid i fuddsoddi yn y rhwydwaith Hawliau Tramwy Cyhoeddus a'u gwella, i ganiatáu mynediad i fwy o bobl at y rhwydwaith gan wella llesiant cyffredinol.  Denu cyllid i fuddsoddi yn seilwaith gwyrdd Ceredigion mewn ardaloedd trefol a gwledig, i wella bioamrywiaeth ac amlygu / cynyddu cyfraniad i liniaru effeithiau'r newid yn yr hinsawdd.	Tystiolaeth o gynlluniau yn cael eu cyflwyno ac effaith ar hygyrchedd tir a chynnydd i ddefnydd Tystiolaeth o gynlluniau yn cael eu cyflwyno ac effaith o'u cymharu â nodau hinsawdd CS Ceredigion.	Llywodraeth Cymru Partneriaid fforwm mynediad lleol Cyfoeth Naturiol Cymru	Gweithgarwch parhaus

Tybiaeth well o Geredigion fel lle bywiog i fyw a gweithio ynddo ac i ymweld ag ef.	➔	Lansio a gweithredu rhaglen marchnata a chyfathrebu ragweithiol i hyrwyddo Ceredigion fel lle i fyw, gweithio a chwarae (O dan frandiau Caru Ceredigion a Darganfod Ceredigion)	Tystiolaeth o ymgyrch ragweithiol ar waith	Partneriaid Byrddau Gwasanaethau Cyhoeddus	Lansio yn 2021 ac yn barhaus
Gwneud Ceredigion yn lle bywiog ar gyfer digwyddiadau	➔	Datblygu a gweithredu strategaeth digwyddiadau i ddenu digwyddiadau mawr addas i Geredigion.	Nifer y digwyddiadau sy'n cael eu cynnal		2021 ac yn barhaus

Draft



Blaenoriaeth 3: Menter

Rhywle i fentro

Ein huchelgais ar gyfer y dyfodol

Yn syml, rydym ni eisiau gweld Ceredigion fel lle gywch i gychwyn busnes ac i dyfu busnes.

Byddwn yn gweld busnesau newydd yn cychwyn ar draws amrywiaeth o sectorau, ond yn canolbwyntio'n benodol ar ein cryfderau craidd sef gweithgynhyrchu bwyd, amaethyddiaeth, amaeth-dechnoleg, twristiaeth, gwyddor amgylcheddol, awyrfod, sbectrwm a diwydiannau ymchwil a datblygu seiliedig ar wyddoniaeth eraill. Bydd yr economi sylfaenol hefyd yn chwarae rhan bwysig mewn twf yng Ngheredigion, gyda chyfleoedd allweddol ym meysydd adeiladu a gofal yn arbennig.

Ein huchelgais yw gweld cynnydd hefyd i gyfran ein busnesau sydd o faint canolig (yn cyflogi dros 50 o bobl).

I gyflawni hyn, bydd angen i ni ddatblygu dull partneriaeth gwirioneddol gan gynnwys y sector cyhoeddus, busnesau, sefydliadau trydydd sector a'r byd academiaidd, i sicrhau bod yr amodau ar gyfer datblygu cymuned fusnes sy'n ffynnu ar waith.

“...rydym am weld Ceredigion fel lle gwyh i gychwyn busnes ac i dyfu busnes”

Ble ydym ni nawr?

Mae Ceredigion yn gartref i sylfaen gadarn o fusnesau llwyddiannus. Mae'r mwyafrif llethol yn fusnesau bach ac yn ficro-fusnesau.

Er bod cyfraddau goroesi busnesau ymhlith yr uchaf yng Nghymru, nid yw'r gyfradd cychwyn busnesau yn ddigon uchel ar hyn o bryd i ddarparu'r peiriant ar gyfer twf sydd ei angen ar economi Ceredigion. Mae diffyg olyniaeth mewn rhai achosion yn arwain at fusnesau hyfyw sy'n ffynnu yn rhoi'r gorau i fasnachu, gan gyfrannu at gyfraddau marwolaeth busnes uwch.

Ceir arwyddion cadarnhaol – mae gennym nifer o bobl fusnes ifanc uchelgeisiol sydd wedi sefydlu busnesau newydd sy'n ffynnu yn ddiweddar, yn enwedig yn y diwydiant bwyd. Mae buddsoddiadau ym Mhrifysgol Aberystwyth hefyd yn dangos addewid mawr o ran gallu denu busnesau newydd yn seiliedig ar y gallu ymchwil a datblygu gwyddonol.

Mae gennym drydydd sector sy'n ffynnu hefyd gan gynnig y sylfaen i gymunedau o bobl weithredu a rhoi sylw i anghenion penodol, er enghraifft ym meysydd gofal, hyfforddiant a chymorth cyflogaeth.

A wyddech chi?

Mae 2,810 o fentrau wrthi'n gweithio yng Ngheredigion, gyda'r mwyafrif helaeth yn ficro-fentrau sy'n cyflogi hyd at 9 o bobl.

Dim ond 0.5% sy'n faint canolig – sy'n cyflogi rhwng 50 a 249 o bobl – ond rydym am gynyddu'r nifer hwn dros y pymtheng mlynedd nesaf fel bod cyfleoedd newydd am swyddi sy'n talu cyflogau uwch.

Y sectorau cyflogaeth mwyaf yng Ngheredigion yw:





Blaenoriaeth 3: Menter

Rhywle i fentro

Yr hyn y mae angen i ni ei wneud

Mae'n rhaid mai'r uchelgais yw ein bod yn creu swyddi sy'n ysgogi mwy o ffyniant personol a chyfle sy'n tyfu ein heconomi yn gynaliadwy ac yn mynd i'r afael â'n her cynhyrchiant.

I wneud hynny, bydd yn rhaid i ni weithio mewn partneriaethau cydweithredol cryf i greu'r amodau iawn a chynnig y cymorth iawn i'r cyfleoedd hyn gael eu creu. Dim ond trwy ddull tîm lleol cryf ar draws sefydliadau fel Cyngor Sir Ceredigion, Llywodraeth Cymru, addysg uwch a phellach, y trydydd sector – a'r nifer o ddarparwyr cymorth presennol.

Er y disgwylir i'r prif ysgogiad twf ddod o'r sector preifat, bydd cyfleoedd sylweddol yn y trydydd sector hefyd. Byddwn yn croesawu busnesau a mentrau twf newydd ar draws amrywiaeth o sectorau, gan adeiladu ar gryfderau ein diwydiant a'n hasedau presennol a defnyddio ein pobl fedrus yn effeithiol.

Fel Cyngor, byddwn hefyd yn ceisio defnyddio ein hasedau, ein hadnoddau a'n rhwydweithiau i gryfhau'r cynnig a'r cymorth i alluogi twf menter a sicrhau eu bod yn ffynnu yma. O ganlyniad, bydd Ceredigion yn cael ei ystyried fel lle gwych i redeg busnes ynddo.

Byddwn yn creu cyfleoedd i bawb sydd eisiau cyfrannu at dwf mentrau newydd a phresennol wneud hynny, gan fanteisio ar y cyfoeth o wybodaeth a phrofiad sy'n bodoli yng Ngheredigion.

Pwy sydd angen cymryd rhan?

Bydd angen i fusnesau newydd a phresennol fod yn ganolog i'n gwaith i gefnogi ein twf economaidd. Byddwn yn gweithio'n agos gyda'r sector preifat yng Ngheredigion i ddeall eu problemau a'u hanghenion, ac yn gweithio i fynd i'r afael â nhw pan fo'n bosibl, mewn partneriaeth â sefydliadau a sectorau allweddol eraill, gan gynnwys:

- Llywodraeth Cymru
- Partneriaeth Tyfu Canolbarth Cymru
- Sefydliadau Addysg Bellach ac Uwch
- Darparwyr sgiliau a hyfforddiant
- Cyrff cynrychioli busnes
- Ariannwyr preifat a chyhoeddus
- Sefydliadau trydydd sector



Marchnad Ffermwyr Aberystwyth yn Aberystwyth

A wyddech chi?

Mae gan Geredigion un o'r poblogaethau mwyaf yng Nghymru sy'n gweithio gartref – mae tua 17.3% o boblogaeth oedran gweithio'r sir yn weithwyr cartref, sy'n cyfateb i tua 6,200 o bobl. Mae hyn yn cynnig cyfleoedd gwych i fyw a gweithio yn y sir.

Astudiaeth Achos: Mae **Ridiculously Rich by Alana** yn un o lwyddiannau Ceredigion ac mae bellach yn enw adnabyddus yn y sector bwyd a diod yma a thu hwnt. Mae gwreiddiau'r busnes yng ngorllewin Cymru ac mae ganddyn nhw bopty pwrpasol yn Aberystwyth i greu'r cynnyrch.

Yn dilyn llwyddiant cynnar Alana yn gwerthu cynnyrch ledled y wlad ac yn ennill cyfres "The Apprentice", mae ei phortffolio wedi ehangu'n sylweddol ac mae ei hangerdd dros y gwaith mor gryf ag erioed.

Mae gan Ridiculously Rich bellach 50 o bartneriaid sy'n mynd â chacennau i ddigwyddiadau ledled y Deyrnas Unedig ac yn cyflenwi manwerthwyr annibynnol lleol. Mae wedi creu bariâu 'Grab & Go' ac mae wedi gosod unedau gwerthu hunan-wasanaeth sy'n dangos brand y cwmni mewn siopau cyfleustra a gorsafoedd petrol. Mae'r busnes yn parhau i esblygu; mae ganddo bresenoldeb cryf ar-lein ac mae modd tanysgrifio'n fisol i'r cynnyrch erbyn hyn. Yn 2020 agorodd Alana ei siop gyntaf, yn Aberystwyth, sy'n edrych allan dros Fae Ceredigion.

Dymuna Alana roi'r cyfle i eraill redeg busnes drwy ddechrau eu masnachfaint Ridiculously Rich eu hunain drwy ei chynllun cacenpreneur a llysgenhadon.



Blaenoriaeth 3: Busnesau

Rhywle i fentro

Yr hyn yr ydym ni eisiau ei gyflawni	Beth fydd yn cael ei wneud?	Sut byddwn yn mesur cynnydd?	Pwy fydd yn cymryd rhan?	Erbyn pryd bydd hyn yn cael ei gyflawni?
Cynorthwyo cread busnesau newydd a helpu busnesau presennol i dyfu yng Ngheredigion (creu mwy o fusnesau canolig eu maint)	Nod o sicrhau bod 300 o fusnesau newydd yn agor bob blwyddyn yng Ngheredigion.	Cyfrif blynyddol o fusnesau cofrestredig.	<ul style="list-style-type: none"> Llywodraeth Cymru Partneriaeth Tyfu Canolbarth Cymru Sefydliadau Addysg Bellach ac Uwch Darparwyr sgiliau a hyfforddiant Cyrff cynrychioli busnesau Ariannwyr preifat a chyhoeddus Sefydliadau trydydd sector 	Yn flynyddol o 2021
	Teilwra a gwella'r cynnig cymorth busnes a chyllid (gan gynnwys mentora busnes a chyngor a chymorth uniongyrchol) i fusnesau newydd a phresennol, gan weithio gyda'r amrywiaeth briodol o sefydliadau cymorth gan gynnwys Llywodraeth Cymru a'i hasiantaethau (e.e. Busnes Cymru a'r Banc Datblygu).	Tystiolaeth o raglenni cymorth busnes wedi'u targedu sydd ar gael yng Ngheredigion		2021
	Defnyddio asedau a sgiliau'r Cyngor Sir yn greadigol i gynorthwyo gwaith cychwyn a thyfu busnesau (e.e. Canolfan Bwyd Cymru, tir ac adeiladau'r Cyngor)	Adrodd ar ddefnydd o asedau sy'n eiddo i CS Ceredigion at y diben o hyrwyddo busnesau newydd.		2022
Codi ymwybyddiaeth o Geredigion fel lle gwyd i sefydlu a thyfu busnesau	Ymchwilio i sefydlu Canolfan Fenter yng Ngheredigion mewn partneriaeth ag Addysg Uwch a Llywodraeth Cymru.	Adrodd ar gynnydd o ran datblygu'r fenter	<ul style="list-style-type: none"> Cyrff cynrychioli busnesau Ariannwyr preifat a chyhoeddus Sefydliadau trydydd sector 	2025
	Sefydlu rhaglen Gwobrau Busnes ar gyfer Ceredigion.	Tystiolaeth o raglen wobrau wedi'i sefydlu a'i hyrwyddo		2021
	Lansio a gweithredu rhaglen marchnata a chyfathrebu ragweithiol i hyrwyddo gweithgarwch busnes Ceredigion (O dan frand Caru Ceredigion)	Tystiolaeth o ymgyrch ragweithiol		2021

Cryfhau / Manteisio ar gyfleoedd allweddol i'n sectorau allweddol – Bwyd / Ffermio, Amaeth-Dechnoleg, Twristiaeth, technoleg Awyrfod / Sbectwm, Biowyddoniaeth	Parhau i ddatblygu Canolfan Bwyd Cymru a datblygu Parc Bwyd Horeb a gweithio gyda phartneriaid allweddol eraill i helpu i dyfu'r sector bwyd.	Adrodd ar weithgarwch a'i effaith ar gryfder cymharol y diwydiant bwyd yng Ngheredigion	<ul style="list-style-type: none"> Llywodraeth Cymru Partneriaeth Tyfu Canolbarth Cymru Sefydliadau Addysg Bellach ac Uwch Darparwyr sgiliau a hyfforddiant Cyrff cynrychioli busnesau Ariannwyr preifat a chyhoeddus Sefydliadau trydydd sector 	2023
	Darparu buddsoddiadau seilwaith twristiaeth allweddol (e.e. Harbyrau), a pharhau i weithio mewn partneriaeth â'r diwydiant twristiaeth i hyrwyddo cynnig twristiaeth Ceredigion ar y cyd.	Adrodd ar weithgarwch ac ystadegau blynyddol a adroddir trwy adroddiadau STEAM yn dangos effaith ar niferoedd a gwariant ymwelwyr.	2023	
Mynd i'r afael â gwendidau strwythurol / methiant marchnad lle maent yn bodoli yn ein Heconomi Sylfaenol (a'r sectorau Adeiladu a Gofal yn benodol)	Gweithio gyda Phrifysgol Aberystwyth a Phrifysgol y Drindod Dewi Sant i gefnogi buddsoddiadau mewn gweithgareddau ymchwil a thechnoleg gymhwysol allweddol.	Adrodd ar weithgarwch ac effaith o ran busnesau a gychwynwyd a swyddi a grewyd.	2022	
	Ymchwilio i sefydliad busnesau hyd braich ac atebion creadigol eraill i fynd i'r afael â materion capasiti yn y sectorau adeiladu a gofal.	Astudiaeth o ddichonoldeb wedi'i datblygu	2023	
Sicrhau bod y seilwaith gan Geredigion (uniongyrchol ac ategol) i gefnogi cyfleoedd twf.	Parhau i archwilio a datblygu atebion arloesol i gynorthwyo busnesau Ceredigion i ennill mwy o fusnes y sector cyhoeddus yng Ngheredigion.	Mesur cynnydd i'r busnes a enillir gan fusnesau yng Ngheredigion.	2022	
	Gweithio gyda phartneriaid sector preifat a chyhoeddus i ddarparu'r seilwaith safleoedd ac eiddo sy'n ofynnol i gefnogi twf mewn safleoedd cyflogaeth allweddol ar draws Ceredigion	Adrodd ar safleoedd ac eiddo perthnasol sydd ar gael i gefnogi sefydliad a thwf busnesau yng Ngheredigion.	<ul style="list-style-type: none"> Llywodraeth Cymru Partneriaeth Tyfu Canolbarth Cymru 	2021 ac yn barhaus
Datblygu a chynnal dull cydweithredol cryf o sicrhau twf economaidd.	Sefydlu system rheoli cyfrifon allweddol fel bod gan fusnesau allweddol bwyntiau cyswllt perthnasol a nodwyd yng Nghyngor Sir Ceredigion i helpu i fynd i'r afael â'u gofynion	Rhestr o gyfrifon allweddol ar waith, gyda thystiolaeth o gyfathrebu â'r holl fusnesau allweddol.	<ul style="list-style-type: none"> Busnesau yng Ngheredigion Llywodraeth Cymru a sefydliadau cymorth busnes eraill 	2021 ac yn barhaus
	Ymchwilio i ddichonoldeb a defnyddioldeb sefydlu fforymau busnes / sectorol.	Ysgrifennu adroddiad ar ymarferoldeb sefydlu fforymau busnes, gan gynnwys tystiolaeth o'r galw gan fusnesau.		



Blaenoriaeth 4: Cysylltedd

Cysylltedig - Cysylltu Ceredigion

Ein Huchelgais ar gyfer y Dyfodol

Cysylltedd Digidol, Trafnidiaeth ac Ynni

Cysylltedd digidol – Yn syml, ein huchelgais yw sicrhau nad yw trigolion a busnesau Ceredigion o dan anfantais oherwydd diffyg cysylltedd digidol. Cydnabyddir yn eang bod cysylltedd digidol yn cael ei ystyried erbyn hyn yn rhan hanfodol o fywyd cartref a busnes, ac mai dyma'r pedwerydd cyfleustod. Nid yw'n ymwneud â dal i fyny felly – ond sicrhau bod gennym yr un mynediad a chyfle â threfi a chymunedau ledled y DU. Mae hynny'n golygu uchelgais i ddarparu gwasanaethau sy'n cyfateb i gyfwerth â ffibr llawn i lefelau ymhell uwchlaw'r cyrhaeddiad presennol o 80%.

Hoffem i fusnesau fanteisio'n llawn ar dechnoleg i gynorthwyo eu twf, gan ddatblygu dulliau newydd gyda chysylltedd trwy dechnoleg newydd, fel 'Y Rhyngwyd Pethau', i sicrhau bod busnesau yng Ngheredigion ar flaen y gad o ran datblygiadau ac yn ysgogi twf economaidd gwledig, yn hytrach na disgwyl i ddal i fyny.

Cysylltedd trafndiaeth – I ysgogi twf economaidd a denu busnes newydd, mae angen i ni wella cysylltedd i Geredigion ac oddi mewn iddi. Byddwn yn adeiladu ar ein cysylltiadau presennol i ddarparu'r rhwydwaith trafndiaeth sydd ei angen i helpu i dyfu'r economi a chynhyrchiant.

Mae rhwydweithiau trafndiaeth dibynadwy, cydnerth, cynaliadwy a chysylltiedig yn hanfodol bwysig i dwf economaidd a chymunedau yng Ngheredigion. Bydd gwell cysylltedd trafndiaeth yn chwarae rhan hollbwysig i gynorthwyo llifoedd economaidd, i wella hygyrchedd, i ddenu buddsoddiad ac i alluogi datblygiad.

Cysylltedd Ynni – Mae cysylltedd fforddiadwy i rwydwaith ynni wedi'i ddatgarboneiddio yn rhan hanfodol o'n twf economaidd yn y dyfodol. Ynni yw popeth, hebdo ni allwn wresogi ein cartrefi, symud o gwmpas, na gweithio. Mae agenda ddatgarboneiddio'r DU yn golygu bod yn rhaid i ynni ddod o ffynonellau adnewyddadwy yn y dyfodol. Mae'r sir a'r rhanbarth mewn sefyllfa dda i gyfrannu at ddiwallu'r angen hwn, ond mae seilwaith grid gwael ar hyn o bryd yn atal hyn.

Ble ydym ni nawr?

Mae cysylltedd trafndiaeth, digidol ac ynni yn dair her allweddol.

Mae cysylltedd digidol gwael o ran band eang gwael a signal symudol anghyson ac annibynadwy yn parhau i ymleiddio cymunedau gwledig, yn enwedig y rhai sy'n byw mewn ardaloedd anodd eu cyrraedd; gan achosi rhwystredigaeth; rhwystro busnesau gwledig ac atal pobl rhag ymgysylltu â gwasanaethau ar-lein. Mae'n rhaid i ni gydnabod bod angen gwell cysylltedd arnom er mwyn denu busnesau newydd neu arafu lleihad ein poblogaeth.

Mae maint a natur anghysbell a gwasgaredig aneddiadau yng Ngheredigion yn achosi heriau o ran cludo nwyddau a phobl. Mae'r rhwydwaith o Gefnffyrdd a ffyrdd Sirol a'r coridorau rheilffordd yn y rhanbarth yn cwmpasu ardal eang wedi eu cyfyngu gan ddaearyddiaeth y sir. Mae'r ffyrdd yn rhai unffrwd, sy'n achosi cyflymderau cyfartalog gwael, amseroedd teithiau hir a dibynadwyedd gwael.

Er bod Ceredigion yn allforiwr trydan net ar hyn o bryd, mae seilwaith grid gwael yn gwneud cysylltiadau ynni sylweddol newydd yn afresymol o ddrud, sy'n gyfyngiad posibl.

Astudiaeth Achos: Cynllun Peilot Digidol Llwybrydd 4G

Mae'r angen am gysylltedd digidol da wedi bod yn hanfodol yn ystod pandemig Covid. Fodd bynnag, daeth yn amlwg bod cysylltedd gwael yn achosi problemau sylweddol i'r rheini yng Ngheredigion a fu'n ymateb i'r achos ac yn gweithio o adref. O ganlyniad, sefydlwyd peilot yn archwilio'r defnydd o dechnoleg amgen i wella cyflymderau band eang drwy geblau sefydlog.

Treialwyd llwybryddion 4G mewn lleoliadau o amgylch Ceredigion. Mewn ardaloedd lle gellid derbyn signal 4G, roedd yn caniatáu i bobl barhau â'u dyletswyddau a chynnal cysylltiad â chwsmeriaid, cyflenwyr ac aelodau o'r gymuned.

"Rwyf wedi gweld gwelliant enfawr. Gallaf nawr dderbyn tua 25Mbps o'i gymharu â'r uchafswm o 3Mbps cyn hynny. Mae mynediad at gyflymder band eang uwch wedi cael effaith fawr ar fy ngallu i weithio gartref." (Endaf Griffiths, Wavehill)



Gorsaf Bŵer Rheidol yw'r prosiect ynni dŵr mwyaf yng Nghymru yn cynhyrchu **85 GWh o drydan** sy'n ddigon i bweru **20,000 o gartrefi**





Blaenoriaeth 4: Cysylltedd

Cysylltedig - Cysylltu Ceredigion

Yr hyn y byddwn yn ei wneud

Mae cydnerthedd y rhwydwaith trafndiaeth yn hanfodol bwysig i'r economi. Mae angen buddsoddiad i fynd i'r afael â phroblemau trafndiaeth sylfaenol sy'n cyfyngu symudiad o gwmpas y Sir ac ar draws ein ffiniau i siroedd eraill. Mae Strategaeth Cludo Nwyddau Gororau a Chanolbarth Cymru, er enghraifft, yn tynnu sylw at nifer o broblemau i fusnesau a fydd angen cyfuniad o ymyraethau sy'n cefnogi ac yn gwella'r rhwydwaith, gan wneud rhanbarth y Canolbarth yn fwy cysylltiedig. Mae hyrwyddo moddau teithio cynaliadwy a datgarboneiddio trafndiaeth hefyd yn uchelgeisiau sylweddol i Geredigion i sicrhau ein bod ni ar fin mynd i'r afael â'r argyfwng newid hinsawdd.

Ein nod yw system drafnidiaeth integredig a fforddiadwy sy'n hwyluso twf economaidd, yn sicrhau mynediad i bawb at wasanaethau a chyfleoedd, yn cynnal ac yn gwella ansawdd cymunedau, ac yn cefnogi'r newid i ddyfodol carbon isel.

Byddwn hefyd yn gweithio gyda phartneriaid i sicrhau nad yw dyhead Ceredigion am dwf economaidd yn cael ei ddal yn ôl gan gyfyngiadau yn y cyflenwad ynni. Byddwn yn ymchwilio i'r posibiladau o ddefnyddio ffynonellau trydan adnewyddadwy, o fewn rhwydwaith dosbarthu lleol i hybu twf economaidd yn y dyfodol.

Ni fydd cyfyngiadau mewn cysylltedd digidol ychwaith yn cael arafu'r potensial ar gyfer twf economaidd yng Ngheredigion. Mae cysylltiad band eang cyflym eisoes yn bosibl yn eang yng Ngheredigion ond byddwn yn gweithio i sicrhau bod gan bob cymuned a busnes yng Ngheredigion fynediad at y cyflymderau cysylltu angenrheidiol i alluogi pobl i fyw, gweithio a thyfu busnesau yng Ngheredigion.

Pwy sydd angen cymryd rhan?

Byddwn yn gweithio gyda phartneriaid ar bob lefel o lywodraeth, yn dibynnu ar natur ddatganoledig y polisi, i sicrhau bod yr angen am fuddsoddiad, a'i effaith, yn cael eu mynegi'n glir.

Byddwn yn gweithio gyda chymunedau ledled Ceredigion i nodi a hwyluso cyfleoedd ar gyfer camau gweithredu o dan arweiniad y gymuned, a hynny ym meysydd ynni a chysylltedd digidol.

Byddwn hefyd yn gweithio gyda phartneriaid yn y sector preifat a'r trydydd sector a all gyflwyno datrysiadau a helpu i gyflawni ein hamcanion yn y maes hwn.

A wydech chi?
Trigolion Ceredigion sy'n drydydd yng Nghymru o ran eu pellteroedd cymudo i'r gwaith - y pellter cyfartalog a deithir i'r gwaith yw 21.3km, sy'n uwch na'r cyfartaledd cenedlaethol o 16.7km



“Rydym am i fusnesau fanteisio i'r eithaf ar dechnoleg i gefnogi eu twf, gan ddatblygu dulliau newydd ar y cyd â chysylltedd”





Blaenoriaeth 4: Cysylltedd

Cysylltedig - Cysylltu Ceredigion

Yr hyn yr ydym ni eisiau ei gyflawni

Beth fydd yn cael ei wneud?

Sut byddwn yn mesur cynnydd?

Pwy fydd yn cymryd rhan?

Erbyn pryd bydd hyn yn cael ei gyflawni?

Gwelliant i'r rhwydwaith ffyrdd	<p>Ceisio cymorth a chyllid ar gyfer buddsoddiad i:</p> <ul style="list-style-type: none"> • Wella cysylltedd y sir gan roi sylw i lwybrau strategol trawsffiniol. • Mesurau gwella i'r rhwydwaith Cefnffyrdd a ffyrdd Sirol gan gynnwys rhaglen mannau cyfyng a chysylltiadau â marchnadoedd allweddol <ul style="list-style-type: none"> o A44 Aberystwyth i Langurig. o Coridor Arfordirol Strategol Gorllewin Cymru yn cysylltu Gogledd a De-orllewin Cymru. • Sicrhau cydnerthedd y rhwydwaith Ffyrdd Sirol i gefnogi'r rhwydwaith strategol 	Strategaethau a rhaglenni newydd ar gyfer gwella ffyrdd yn lleol ac yn rhanbarthol.	Llywodraeth Cymru Awdurdodau Cyfagos	Parhaus o 2021
Gwelliannau i'r ddarpariaeth Cludiant Cyhoeddus yng Ngheredigion	<p>Ceisio cymorth a chyllid buddsoddi i:</p> <p>Wella coridorau rheilffordd strategol:-</p> <ul style="list-style-type: none"> • Gwelliannau i gyflymder y llinell ar Reilffordd Cambria; annog cludo nwyddau ysgafn ar wasanaethau teithwyr ar Brif Reilffordd Cambria; a datblygu canolfan drafnidiaeth strategol Aberystwyth • Ymyraethau cysylltedd gwasanaethau fel gwasanaeth bob awr llawn ar Reilffordd Cambria i Birmingham International a 	Tystiolaeth bod strategaethau a darpariaeth ar waith	Llywodraeth Cymru a phartneriaid trafndiaeth	Parhaus o 2021

	<p>chysylltedd â HS2; ail-gyflwyno gwasanaeth uniongyrchol i Lundain</p> <ul style="list-style-type: none"> • Datblygu llwybr strategol TrawsCymru a chanolfannau / cyfnewidfeydd bysiau pellter hir strategol â thrafnidiaeth ymatebol integredig. • Cefnogi datblygiad Bwcabus • Diogelu coridor rheilffordd Aberystwyth i Gaerfyrddin • Sicrhau bod y ddarpariaeth yn cefnogi'r gofynion/mentrau twristiaeth 			
Newid ymddygiad	<p>Pecynnau cymorth teithio llesol i annog cerdded a beicio, a datblygu seilwaith. Dosbarthu gwybodaeth gan ddefnyddio rhwydweithiau gwybodaeth digidol ac addysg i geisio sicrhau newid mewn ymddygiad</p>	Tystiolaeth o rwydwaith gwybodaeth sy'n tyfu a phobl yn manteisio ar wasanaethau	Llywodraeth Cymru	Parhaus o 2021
Datgarboneiddio Trafnidiaeth	<p>Datblygu dull strategol o ddarparu seilwaith gwefru cerbydau trydan, gwaith dichonoldeb ar botensial hydrogen a dewis trefi allweddol i dreialu cynllun datgarboneiddio.</p>	Cynllun datgarboneiddio ar waith	Pob partner trafndiaeth	2021
Integreiddio Trafnidiaeth	<p>Cyflwyno mesurau cysylltedd Gwledig fel priffyrdd clyfar, canolfannau ffordd a rheilffordd a thocynnau integredig a thrafnidiaeth ymatebol integredig.</p>	Ymchwilio i ddichonoldeb a chynllun cysylltiedig wedi'i sefydlu	Pob partner trafndiaeth	2022
Rhwydwaith Grid Trydan Estynedig	<p>Ymchwilio i bryniant cyhoeddus capasiti Grid sylweddol i'w werthu ymlaen i ddatblygiadau unigol (cynhyrchu a defnyddio)</p>	Capasiti grid ar gael yn y sir ar gyfer cyflenwi / defnyddio ynni adnewyddadwy	Gwasanaeth ynni LIC Gweithredwyr Rhwydwaith Ardal a'r Grid Cenedlaethol. Yr Adran Busnes, Ynni a Strategaeth Ddiwydiannol (BEIS) / Ofgem	2022

Rhwydwaith ynni datgarboneiddio	➔	Ymgyrch gyhoedduswydd i gyfleu'r angen am rwydwaith ynni datgarboneiddio a manteision lleol hynny	Llwyddiant ceisiadau cynllunio ar gyfer datblygiadau yn ymwneud â gosodiadau ynni adnewyddadwy	Datblygwyr Llywodraeth Cymru	2025
Archwilio potensial Economi Hydrogen	➔	Ymchwilio i droi cynhyrchiad trydan adnewyddadwy yn nwy hydrogen, gan leihau'r angen am fuddsoddiad mewn Cysylltedd Grid.	Eglurder ynghylch dichonoldeb H ₂ yn y sir a'r rhanbarth.	Datblygwyr Cyngor Sir Powys	2021

Draft

Yr hyn yr ydym ni eisiau ei gyflawni

Beth fydd yn cael ei wneud?

Sut byddwn yn mesur cynnydd?

Pwy fydd yn cymryd rhan?

Erbyn pryd bydd hyn yn cael ei gyflawni?

Datblygu dull strategol o ymdrin â'r Digidol	Datblygu Strategaeth Ddigidol i Geredigion	Llunio'r strategaeth		2020
Gwella cysylltedd yng Ngheredigion	Mesurau i ymestyn cwmpas Band Eang Cyflym lawn a Gwibgyswllt yn y rhanbarth gan ganolbwyntio ar ffibr i'r eiddo. Rhaglen o fesurau i ymestyn cwmpas 4G dibynadwy da ar draws y rhanbarth. Dylanwadu a lobio ar gyfer newidiadau polisi: <ul style="list-style-type: none"> • Cael gwared ar gapiau archebion ar gyfer cynhyrchion ffibr ar alw • Sicrhau cyflymder rhwydwaith ffôn symudol gofynnol o 10mbe ar sail cryfder signal 50% yn ystod cyfnodau brig. 	Data treiddiad/cwmpas band eang	Llywodraethau Cymru a'r DU; Darparwyr, Cymunedau	Hyd at 2025
Gwella lefelau manteisio digidol yng Ngheredigion	Gweithio gyda darparwyr cymorth i ychwanegu gwerth ac ehangu cyrhaeddiad a chwmpas eu cymorth.	Data ar y nifer sy'n manteisio a gwybodaeth am ddarparwyr	Llywodraeth Cymru, Cymunedau Digidol Cymru, Cyswllt Ffermio ac ati	Parhaus



Sut byddwn ni'n darparu ac yn cyfrannu adnoddau at Strategaeth Economaidd Ceredigion?

Pobl a Phartneriaethau

Bydd darparu'r strategaeth yn gofyn am weithredu â phwyslais gan Gyngor Sir Ceredigion yn gweithio gyda phartneriaid yn y sectorau cyhoeddus a phreifat a'r trydydd sector yn genedlaethol, yn rhanbarthol ac yn lleol.

Bydd Llywodraethau Cymru a'r DU yn bartneriaid allweddol, ac felly hefyd Awdurdodau Lleol eraill lle mae'r camau a nodwyd yn cyfrannu at dwf economaidd rhanbarthol.

Mae'r tîm Twf a Menter yng Nghyngor Sir Ceredigion wedi'i strwythuro a'i ddarparu gydag adnoddau i gyflawni tair swyddogaeth strategol sy'n ganolog i ddarparu'r strategaeth:

- **Tîm twf a datblygu mawr** - mae un tîm yn canolbwyntio ar greu partneriaethau strategol i ddenu buddsoddiadau allweddol a chyflwyno'r blociau adeiladu ar gyfer darparu.
- **Datblygu a rheoli asedau** – bydd y swyddogaeth hon yn y tîm yn sicrhau bod yr asedau ffisegol yr ydym yn berchen arnynt ac yn eu rheoli (gan gynnwys ein hasedau gwyrdd yng Ngheredigion) yn cael eu datblygu a'u rheoli i ddarparu'r canlyniadau strategol a nodir yn y strategaeth fframwaith hon yn effeithiol.
- **Rheoli a darparu prosiectau.** Tîm ymroddedig i reoli a darparu prosiectau, gan weithio gyda phartneriaid lluosog yn y gymuned, yn y sector preifat, yn rhanbarthol ac yn genedlaethol ac yn gyson ag anghenion ariannwyr.

- Bydd pedwerydd tîm yn canolbwyntio ar reoli a datblygu Canolfan Bwyd Cymru er budd economi bwyd Cymru, gan arwain at fanteision eglur i economi Ceredigion hefyd.

Er mwyn cefnogi cyflawni'r uchelgais, mewn rhai achosion, byddwn yn cyflwyno strategaethau a chynlluniau gweithredu manylach, er enghraifft Strategaeth Asedau a Chynllun Gweithredu Digidol.

Bydd prosiectau'n cael eu dwyn ymlaen mewn ymgynghoriad â phartneriaid allanol a mewnol i gyflawni'r gwasanaethau a phrosiectau mwyaf cost-effeithiol ac effeithlon.

Mesur Cynnydd

Bydd cynnydd yn cael ei fesur trwy fonitro dangosyddion perfformiad gan ddefnyddio:

- Monitro ac adolygu llwyddiant y strategaeth yn fewnol yn erbyn dangosyddion perfformiad blynyddol ac effaith hirdymor ar y data economaidd ar gyfer Ceredigion.
- Ymgysylltiad allanol parhaus.

Adolygu'r Strategaeth

Byddwn yn adolygu'r Strategaeth yn barhaus ac yn ei diweddarau gydag ymyraethau newydd wrth i ni eu nodi, a bydd y fersiwn ddiweddaraf ar gael o'n gwefan.



Swallow Yachts yn Aberteifi



Cychod pysgota wrth eu gwaith ym marina Aberystwyth

Dogfennau ategol

Datblygwyd Strategaeth Economaidd Ceredigion gan ddefnyddio'r dogfennau ategol canlynol:

- "Adroddiad Llinell Sylfaen Economaidd" (Chwefror 2020)
- "Adroddiad Adborth Ymgynghoriad ar Strategaeth Economaidd newydd" (Chwefror 2020)
- Adroddiad Diweddariad yr Effaith Economaidd (Hydref 2020)

Mae copiau o'r dogfennau hyn ar gael gan Gyngor Sir Ceredigion

Yn yr un modd, os hoffech **Fersiwn Testun Plaen** neu **Fersiwn Hawdd ei Darllen** o'r ddogfen hon, cysylltwch â Chyngor Sir Ceredigion:

☎ 01545 570881

✉ Cyngor Sir Ceredigion
Canolfan Rheidol
Rhodfa Padarn
Llanbadarn Fawr
Aberystwyth
Ceredigion
SY23 3UE

🌐 www.ceredigion.gov.uk

Credydau Lluniau:

Tudalen 13

Ffotograffiaeth Janet Baxter

Delweddau pysgota tudalennau 1, 2, 6, 9, 25 a 26
Lluniau gan Grŵp Gweithredu Lleol Pysgodfeydd
Bae Ceredigion



Cyngor Sir
CEREDIGION
County Council

Lluniau o'r brig: harbwr
Ceinewydd, llwybr beicio
Ystwyth, traeth a harbwr
Ceinewydd